

# Cavajone ha spetgà dudesch onns

La davosa annexiun svizra d'in abitadi

DA GUIU SOBIELA-CAANITZ

■ **L'istoricher Peter Metz (1913–2009) descriva il Grischun sco che lez era l'onn 1850: «In chantun fitg pover, sfendaglius, stgarpà, manifestamain il pli debel da tuts (...). La lescha federala dals 3 da december 1850 davart la mancanza dal dretg da burgais (...) obligava mintga chantun a nativisar ils senzapatria che sa chattavan sin ses territori (...).** Il Grischun (...) ha stuè dar il dretg da burgais a 6878 persunas, (...) dapli che la terza part dals senzapatria registrads en l'entira Svizra. Per differents vischnancas muntava quai ina veritabla inundaziun da novs vischins: 136 a Cazas, 132 a Mastrils, 104 a Tartar, 224 a Vaz Sut, 100 a Maladers. Bleras da quellas famiglias senza patria (...) engrevgiavan las vischnancas. Il pais da lezzas expensas han manà singulas vischnancas a l'ur da la ruina» (1). Il 1864 ha il Grischun anc survegnì deschedotg famiglias «senza patria» en virtid dal contract da cunfin dals 27 d'avust 1863 tranter la

Svizra ed il giuven reginam talian. Lez ha numnadamain surlaschè a la Svizra sin via amicabile il vitg da Cavajone sur Brüschi, fin lura senza appartegnientscha statale. «Ma las bleras famiglias da lez vitg n'avevan nagin document da legitimaziun e stuevan perquai valair sco senza patria» (2). Il chantun era pia obligà da nativisar la populaziun senza patria da Cavajone. Per far quai ha'l duvrà dudesch onns.

## Il dretg natiral da maridar

Ils 22 da zercladur 1869 ha Giovan Domenico Zala (Brüschi) tramess a la regenza in rapport intitulà: «Breve esposizione della Contrada di Cavajone e delle relazioni di cittadinanza de' suoi abitanti.» L'autur descriveva la paupradad da la populaziun e punctuava: «Ils avdants stattan là bandunads; i na tutgan a nagina pravenda e nagina vischnanca, n'han gnanc ina scola e nagin poveresser. Tiraun [en Vuclina] na renconuscha betg ils Cavajonais sco burgais; lezs vivan quasi sco selvadis ed èn bunamain

tuts analfabets» (3). Ils 4 d'october 1869 ha plevon Giovanni Zanetti (Brüschi) scrit a la regenza davart in pèr da Cavajone che n'astgava betg maridar per mancanza da documents: «I duessan giudair la libertad da maridar en la vischnanca nua ch'i èn naschids e domiciliads (...). Uschiglio èn sco sclavs che l'Italia na marida betg, perquai ch'i n'èn betg ses burgais, entant che la Svizra, nua ch'i èn vischins, na lubescha ad els betg da far diever da quel dretg natiral» (4). Pir ils 29 da december 1873 (!) ha il cussegl federal «suttamess a l'assemblea federala la missiva davart la nativisaziun dals Cavajonais en la vischnanca da Brüschi. Las duas chombras l'han approvada il schaner 1874, mettend a disposiziun ils 17 900 francs che la confederaziun leva dar al chantun per las expensas. Pir l'emprim da december 1874 ha il cussegl grond decretà l'admissiun a l'entir dretg burgais da la vischnanca da Brüschi per las famiglias senza patria domiciliadas a Cavajone (...) cun il dretg d'utilisar il fond da baselgia, il fond da

scola ed il fond dal poveresser da la corporaziun catolica (...). Il decret obligava plinavant la vischnanca a construir e mantegnair a Cavajone in bajetg da scola cun ina stanza da scola ed a procurar per in magister (...). Ils 12 da matg ha Berna tramess ils 17 900 francs empermess. Pir ils 12 da fanadur 1875 han las 108 persunas admessas al dretg da burgais survegnì ils documents relatifs» (5). Lur famiglias purtavan sis differents nums (6); en il cudesch da telefon da 2016, nua che Cavajone stat sut «Campascio», chatt'ins là quatter da quellas schlattas, ma i na stat nagina scola.

1. Peter Metz, *Geschichte des Kantons Graubünden. Tom 2. Cuirra* (Calven, ISBN 3-905261-02-2) 1991, p. 23.
2. Peter Metz (sco nota 1), p. 82.
3. Città da l'istoricher Fabrizio Lardi en: «Quaterni grigionitaliani» 1-2016, p. 90. **Adressa: Giuseppe Falbo, Pro Grigioni Italiano, Martinsplatz 8, 7000 Cuirra.**
4. Città da Fabrizio Lardi (sco nota 3).
5. Fabrizio Lardi (sco nota 3), pp. 91–93.
6. Glista en Fabrizio Lardi (sco nota 3), p. 92, nota 27.